



Uunga siunnersuut Nunalerinermik inuussutissarsiuteqarnermik siuarsaaneq pillugu Inatsisartut inatsisaat

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)
(Siullermeerneqarnera)

Nunarsuarmi nunaqanngilaq, 100 procentimik imminnut inuussutissanik pilersortumik. Nunat tamarmik annerusumik minnerusumilluunniit inuussutissanik tikisitsisarput. Maani nunatsinni annertuumik kissaataavoq, inuussutissanik immitsinnut pilersorsinnaanissarput. Tamanna Demokraatit tapersorsorparput.

Isumaqarpunga imaluunniit naatsorsuutigaara, tamatta maani inersuarmi kalaallit savaanik kalaallillu naatsiaannik nerissalluta iluarisuugipput. Kisiannili aamma nassuerutigisariaqarparput, inuussutissanik taakkuninnga avammut tuniniaanerup aallartinnissaa ajornakusuussasoq, nunaatillit nunani allani taakku suliarisinnaammatigit akikinnermik.

Naalakkersuisullumi §37-apeqqummut 181-2022 akinermini ilisimatitsivoq, nunalerinermi inuussutissanik avammut tuniniaasoqanngingajavittoq. Tassani akisummi aamma ilisimatitsissutigineqarpoq, ukiut tamaasa nunalerinermut annertuunik taaneqarsinnaasumik tapiisoqartartoq. Tamannali aamma nunani allani pisarpoq.

Tassungali atatillugu pingaartuuvoq, eqqarsarluarnissarput. Iluaqutaanngilarmi, soorlu assersuutigalugu nunalerineq aningaasatigit ikiorsertarutsigu annertuallaamik, taamaaliornerup kingunerissammagu, ingerlatanut allanut aningaasasaqartitsinnginnerput soorlu assersuutigalugu peqqinnissamut, meeqqat atuarfiannut isumaginninnermullu. Pingaartuuvoq oqimaatigiinneq eqqortoq nanissallugu.

Taamatuttaaq pingaartuuvoq, nunalerinermi avammut niuernermit isertitaqarnerulernissatsinnut iliuusissamik nassaarnissarput. Siusinnerusukkut eqqaaneqareersutut akinut unammillersinnaanngilagut. Taamaattorli pitsaassutsikkut unammillersinnaasariaqarpugut. Taamaattumik piomagaluarpugut, pitsaassutsikkut qaffasissunik avataaniit unammilleruminaatsut ukkatarineqarnerulernissaat, nunarsuarmi pigissaarnerusunut avammut tuniniarneqarsinnaasut, taakkuninnga allamiut nerisassaataannik mamartulianik perusuttunut.

Naggataatigit maani nunatsinni nunalerinermi suliaqartut tamaasa pingaartumik Kujataani, inuussutissarsiut annertunermik ingerlanneqarmat, qutsavigerusuppakka. Suliniutisi ilungersorlusilu sulinersi pingaartippagut.

Taamatut oqaaseqaateqarluta siunnersuut ataatsimiititaliami susassaqartumi suliareqqitassatut innersuussutigaarput.